

愚

齋

存

稟

愚齋存彙卷第十七目錄

奏疏十七

覆陳鐵路明定幹路枝路辦法摺

遵 旨接辦川粵漢鐵路借款合同定議摺

各省官紳報効振款仍請援案優獎摺

士民助振請予建坊片

郵政由部接管以歸統一摺

部事日繁調員差遣摺

賞給廕生謝 恩摺

各省官紳報効振款仍請援案優獎摺

節婦助振請旌表建坊片

遵籌川粵漢幹路收回辦法摺

代陳川紳呈請租股辦法片

各省官紳報効振款仍請援案優獎摺

李訓鉉報効振款請開復原官片

請准江皖新捐展期勸辦摺

請暫留山西署提法使翁斌孫經理振款片

愚齋存彙卷第十七

奏疏十七

覆陳鐵路明定幹路枝路辦法摺

宣統三年四月

奏爲遵

旨議覆事竊於四月初六日欽奉

上諭給事中石長信奏鐵路亟宜明定幹路枝路辦法一摺該給事中所奏不爲無見著郵傳部按照所奏各節妥籌議奏欽此仰見

朝廷慎重路政採納羣言之至意莫名欽服竊維天下大事必經實驗而後知其難易又必臨機定斷而後免

於游移已故大學士張之洞老成謀國於粵漢川漢鐵路之事計畫最深幾經試驗乃恍然於書生空論難以實行重定

國家籌款造路之策以赴事機而正從前築室道謀之誤此蓋有識之士大夫所共諒其苦衷者也總之環球大勢皆以趕造鐵路爲治內禦外之惟一政策我國幅員廣闊欲謀行政之統一必須路綫之交通又況天富中原饒於地利若無鐵路之風馳電掣朝發夕至則數萬里之膏腴沃壤何以保全利益鞏固邦基然欲路之縱橫四達非

國家出以全力斷難辦到聞德國於數十年前民間亦欲造路而聚訟多年一路不成該政府洞見國家如此重大要政將爲民間牽掣所誤於是毅然定策悉歸國有不久卽四通八達碁布星羅今日德國餉源之最大者卽鐵路進款是也此誠可爲中國前事之師矣近年以來邊防日亟疆臣輒以籌造邊陲鐵路爲救國第一策然欲修邊路必先通腹路若不有腹路徵調之神速何以固邊路之防護不有腹路營業之進款何以供邊路之修養今我置內地幹路爲不急之務而欲侈談國防是何異建高樓而不平其地濬百川而不探其源也

查各省商辦鐵路自批准之後苟能隨時集款隨時興工則六七年來亦必已有成就雖終不能化門戶鄉土之見他年再援日本之例買歸國有亦何不可而無如經理之人或植黨以營私或蹈虛不務實集茲鉅款已由閭閻搜括而來乃猶不免虛糜坐耗甚至侵挪倒帳失之於董司之手者仍必索之於小民此皆苦於當局者程度不足副其責成以致路工濡滯耗費浩繁皆出於意料之外不知鐵路不能完工則所入必不敷所出遑論股分之息是欲利地方而適所以害地方也該給事中所奏利害間不容髮者速成之利國與民其之延

誤之害實亦國與民其之也

諭旨嘉其不爲無見

臣

等謹按原奏各節皆屬詳盡而

其要尤在幹路收歸國有迅速籌辦枝路則仍可由商

民量力辦理此爲要領

臣

部經與外務部度支部王

臣再四面商意見相同惟從前批准商辦各案並不分

別幹路枝路且有已定官辦而又續准商辦又有已定

商辦而又續改官辦更有一幹路而使官商錯雜其間

不特將來路政無以收統一之效卽目前馭下亦未免

軒輊攸分實不足以成政策如該給事中所奏

國計民生兼籌明定統一辦法似不可再事因循應請

長不彙 卷一
聖明裁斷並懇

明降諭旨曉示天下俾臣民共知遵守所有遵

旨議覆緣由是否有當伏祈

皇上聖鑒訓示謹

奏 本月十一日奉

硃批另有旨欽此

宣統三年四月十一日奉

上諭郵傳部奏遵議給事中石長信奏鐵路亟宜明定
幹路枝路辦法一摺所籌辦法尙屬妥協中國幅員廣
闊邊疆遼遠袤延數萬里程途動需數閱月之久朝廷

每念邊防輒勞宵旰欲資控禦惟有速造鐵路之一策
況憲政之諮謀軍務之徵調土產之運輸胥賴交通便
利大局始有轉機熟籌再四國家必得有縱橫四境諸
大幹路方足以資行政而握中央之樞紐從前規畫未
善並無一定辦法以致全國路政錯亂紛歧不分枝幹
不量民力一紙呈請輒行批准商辦乃數年以來粵則
收股及半造路無多川則倒帳甚鉅參追無著湘鄂則
開局多年徒資坐耗竭萬民之脂膏或以虛糜或以侵
蝕恐曠時愈久民累愈深上下交受其害貽誤何堪設
想用特明白曉諭昭示天下幹路均歸國有定爲政策

所有宣統三年以前各省分設公司集股商辦之幹路延誤已久應卽由國家收回趕緊興築除枝路仍准商民量力酌行外其從前批准幹路各案一律取銷至應如何收回之詳細辦法著度支部郵傳部凜遵此旨悉心籌畫迅速請旨辦理該管大臣毋得依違瞻顧一誤再誤如有不顧大局故意擾亂路政煽惑抵抗卽照違制諭將此通諭知之欽此

遵旨接辦川粵漢鐵路借款今尙定議摺

宣統三年四月總協理大

臣度支部大臣會奏

奏爲遵

旨接辦粵漢川漢鐵路借款合同磋商定議恭摺會陳
仰祈

聖鑒事宣統元年八月二十四日欽奉

諭旨粵漢鐵路鄂境川漢鐵路事宜著歸郵傳部妥協
接辦欽此臣等查前大學士張之洞於光緒三十四年
十一月十六日奏明詳察目前時勢參以津浦鐵路借
款章程條款並無流弊英公司經理人來京與臣定議

已派令曾廣鎔高凌霨來京與該公司面議鄂湘兩省
借款條規即可定議已與湖廣總督陳夔龍湖南巡撫
岑春煢商妥等語奉

旨依議欽此該大學士任內已定之借款草合同係於
宣統元年四月簽字因病不及陳奏旋即出缺兩年以
來各省拒款延擱至今而英德法美四國銀行屢至郵
傳部催辦及本年該四國駐京使臣照會外務部均傳
述各銀行之言以張之洞係國家代表草約已畫即爲
成議催促實行外務部郵傳部幾至難於應付臣等又
查該鐵路倘若不歸國有取銷舊案則商民籌款辦工

亦必延宕本年四月十一日欽奉

諭旨郵傳部奏粵漢鐵路鄂境川漢鐵路借款正合同勢難久延請將該部批准前案取銷等語著依議欽此

臣宣懷遵卽按照草合同與英德法美四銀行代表再四磋商原議五釐息九五扣借款英金六百萬鎊一爲贖回前美國合興公司發售金圓債票約計五十萬鎊一爲建造官鐵路幹綫由湖北省武昌府起經岳州長沙至郴州宜章縣爲止又爲建造幹綫由廣水起經襄陽荆門州至宜昌爲止又建造枝路自漢陽起至荆門州止今改議將漢荆枝路六百里刪除以分枝幹界限

並因宜昌以上山路崎嶇非用專門洋工程司不能妥
速議將宜昌至夔州難工約六百里抵補截去之漢荆
枝路其建造工程自實在開工之日起限三年造竣惟
宜夔路綫艱難期限准其稍長此合同畫押後六個月
內在武昌長沙廣水宜昌四處同時開工以赴幹路速
成之宗旨又原議建造工程如有不敷則向銀行續借
洋款其利息條款仍照現時合同而價值須九四五扣
且須另加抵押之餉源今改議如不敷續借照本合同
條款續售第二批債票毋庸多扣亦毋庸再加餉源抵
押其數不逾四百萬鎊惟因不加抵押年限須改四十

年仍訂明十年後無論何時均可還清第十七年以後仍無須加二鎊半則雖稱四十年之限仍與二十五年之限毫無分別又原議本合同第二款所言之鐵路將來或以爲有益或以爲須造枝路如須用外國資本則先儘銀行等商辦今改議爲第二款所言之鐵路如欲展長先以中國款項自行建造如須借外國資本倘銀行等所給之條款利益不少於別家則先儘銀行等商辦又原議或在中國或在外國所存鐵路款項皆須存於匯豐德華匯理各銀行今改爲照淨數一半存於郵傳部所指之交通銀行或大清銀行又原議於購買材

料皆注重外國卽鋼軌大宗亦言明一半購買承辦借款之國今改爲鋼軌及附件皆應自行製造供用以及購買中國材料皆不給用錢其外洋材料須由郵傳部選聘專門工程司驗看此項貨物又原議附件內甚言津浦鐵路原訂合同最爲詳善允准酌照辦理因語涉籠統太無限制已將此附件刪除以上各節磋商數月會晤將及二十次辯論不止數萬言於原約稍可力爭者舌敝唇焦始得挽回數事實已無可再爭至於將來造路之遲速用款之繁簡駕馭工程司之疎密是在督辦大臣之挈領提綱及所派各路總辦之精核勤察謹

將接議合同二十五款繕具清單恭呈

御覽應否卽由郵傳部臣簽字蓋印請

旨遵行再此摺例由郵傳部主稿臣等再三會議意見
相同所有借款草合同實係宣統元年四月簽字其時
資政院尙未開辦現在正合同係遵奉

諭旨著歸郵傳部接辦之案並非目下始行定議惟此
項借款將來如何用法甚關重要自應由郵傳部會同
度支部屆時分造各項表冊卽交資政院議決合併聲
明所有接辦英德法美各銀行鐵路借款緣由理合恭
摺會陳伏乞

皇上聖鑒訓示謹

奏 本月二十二日奉

諭旨郵傳部會奏粵漢川漢鐵路接議英德法美各銀
行借款合同磋商定議繕單呈覽並請旨簽字蓋印一
摺著郵傳大臣簽字餘依議欽此

各省官紳報効振款仍請援案優獎摺

宣統三年四月

奏爲官紳報効災振鉅款仍懇准援前案

優加獎勵恭摺仰祈

聖鑒事竊

臣

於本年三月閒兩次具

奏報効江皖災振鉅款各官紳請照章優獎先後欽奉諭旨均著照所請獎勵等因欽此欽遵在案伏查各災區春振正當緊急叠接查振大臣馮煦及各路散振員紳紛紛電稱皖北一帶雨多晴少淮河驟漲低處被淹高處麥苗亦多傷損舊災未澹新歉將成非加籌振款迅速接濟恐災黎仍作餓殍前功難免盡棄又接皖紳

電謂振無已時款已告罄必須接放夏振公舉義紳黃書霖來京面商請帑各等語臣所籌墊款及新收捐項隨時撥解毫無餘存目前需款愈急愈難焦灼情形正虞束手茲據候選通判陳性良報効振捐銀一萬兩知府銜徐世良報効振捐銀八千兩府經歷銜蔣緯宇報効振捐銀七千兩雙月選用縣丞金振乾通判銜附監生易春光知府銜附監生洪杲翰林院孔目銜皇甫之權各報効振捐銀六千兩法政科揀選舉人姚震員外郎銜徐恩元六品頂戴廩生孝廉方正仇純吉光祿寺署正銜張炳蔚縣丞銜李文恭左錫章江蘇試用縣主

簿華世杞拔貢就職直隸州州判杜希陵保舉選用從九品張樹森同知銜鄭秉衡各報効振捐銀五千兩共計報効振捐銀九萬九千兩均已如數核收由籌振公所稟報前來

臣維

聖慈遠被

優詔疊頒

上履饑溺之懷下竭涓埃之報是以輸誠向化恐後爭先遂得各處善士義紳接踵興起兼旬之間又得籌集鉅資轉濟振用實屬深明大義施及其時自應仍照前案

奏請優獎以拯災黎而策將來查陳性良報効銀兩核與報捐雙月選用道員例銀有餘擬請以道員雙月選用徐世良報効銀兩核與報捐雙月選用知府例銀有餘擬請以知府雙月選用蔣緯宇報効銀兩核與報捐雙月選用郎中例銀有餘擬請以郎中雙月選用金振乾報効銀兩核與報捐雙月先選用直隸州知州例銀有餘擬請以直隸州知州雙月先選用易春光報効銀兩核與報捐不論雙單月選用知州例銀有餘擬請以知州不論雙單月選用洪杲皇甫之權姚震徐恩元報効銀兩核與報捐雙月選用員外郎例銀有餘均擬請

以員外郎雙月選用仇純吉張炳蔚李文恭左錫章報
効銀兩核與報捐不論雙單月選用主事例銀有餘均
擬請以主事不論雙單月選用華世杞報効銀兩核與
報捐雙月先選用同知例銀有餘擬請以同知雙月先
選用杜希陵報効銀兩核與報捐分省試用知縣例銀
有餘擬請以知縣分省試用張樹森鄭秉衡報効銀兩
核與報捐不論雙單月選用知縣例銀有餘均擬請以
知縣不論雙單月選用以上各員所請獎勵按之籌餉
例定銀數詳細復查實係有盈無絀合無仰懇

天恩俯照前奏仍准

特降諭旨所有此次報効鉅款之陳性良等十七員均予如請獎勵感戴

皇仁尤無旣極除飭取各該員履歷造冊咨部外所有官紳報効鉅款仍懇准援前案優獎緣由謹恭摺具陳伏乞

皇上聖鑒訓示謹

奏 本月二十二日奉

諭旨盛宣懷奏官紳報効災振鉅款援案懇請優加獎勵一摺陳性良等十七員均著照所請獎勵該部知道欽此

士民助振請予建坊片

宣統三年四月

再士民捐助振款千兩以上者例得請

旨建坊給與樂善好施字樣歷經遵辦在案茲有直隸保定府補習學堂肄業生唐延碩係廣西臨桂縣人隨侍伊生父二品銜分省試用道候補知府前任易州直隸州知州唐則瑀來直宦遊聞悉皖北奇災需振孔亟仰承已故嫡母一品命婦唐岑氏遺志捐助振銀一千兩由籌振公所核收稟報前來臣查該生所捐銀數核與建坊之例相符洵屬慕義情殷有裨振務相應請旨俯准肄業生唐延碩爲其生父唐則瑀故母唐岑氏

在於原籍自行建坊給與樂善好施字樣以昭激勸謹
附片具陳伏乞

聖鑒訓示謹

奏 本月二十二日奉

旨又片奏肄業生唐延碩爲其父母捐振請建坊等語
著照所請該部知道欽此

郵政由部接管以歸統一摺

宣統三年四月
大臣會奏

總協理

奏爲郵政定期由郵傳部接管以歸統一而符名實恭摺仰祈

聖鑒事竊查憲政編查館奏定行政綱目規定郵傳部郵政司掌全國郵政註明郵政局現在由稅務司辦理亟應改歸郵傳部又查宣統元年八月憲政編查館會同覆核各衙門九年籌備清單內開郵政附屬稅務司本在未設專部以前風氣未開暫歸兼轄今既有專官自應責成該部堂官會商稅務大臣籌備收回方法以符名實各等因均經奉

旨允准郵傳部卽於上年奏陳分年籌辦郵政繕具清單恭呈

御覽宣統二年九月初二日奉

旨依議欽此本年四月咨商稅務大臣將郵政事宜剋期移交以便接管旋據復稱定於本年五月初一日移交已劄行代理總稅務司將交替事宜先期準備等語臣宣懷卽與代理總稅務司安特生面議交接大概情形查郵政始於光緒二十二年二十四年先後奉

旨推行沿江沿海各省暨內地水陸各路名爲大清郵政

敕下外務部轉飭總稅務司赫德兼司其事經赫德遴派稅務司帛黎爲總辦歷十數年各省通行郵政共有六百餘局又代辦四千二百餘處並與數國訂立往來互寄之合同與郵傳部所辦之電報相似辦理頗有成效總稅務司並因郵政進款入不敷出請外務部核准由新關項下每年指撥協濟款七十二萬兩每年實交不過三十餘萬兩據報宣統元年止海關實墊銀一百七十八萬餘兩臣等查總稅務司兼辦以來實屬著有勞勩其所用稅務司帛黎專辦郵政井井有條尤爲難得之人才此次歸部收回尤須認真推廣務使驛站由

漸裁撤郵局由漸加增並欲試辦儲蓄爲裕

國足民之計歐亞各國郵政與電報儲蓄本屬鉤連惟
茲事重大全在得人力杜因循苟且之習自不難收與
年俱進之功夫行政必先具大綱乃可徐籌細目郵傳
部奉

旨設立四政奏明各設總局照章奏派局長各專責成
郵政關係二十二行省與船路電三政以及驛站銀行
皆有互相維繫之處歸部以後既不歸總稅務司兼轄
自應在部設立郵政總局照章派一局長以資承接局
長之下應派總辦一員會辦一員總司其事所有郵政

總局局長一時不易得人署郵傳部左侍郎李經方淹
賈西學出使多年兼綜鐵路總局將及半載悉心整頓
不辭勞怨措置裕如今不得已擬請仍援鐵路局辦法
卽由李經方暫行兼署其郵政總辦一員擬以二品銜
三等第一寶星帛黎派充其稅務司原缺並由郵傳部
知照外務部轉飭開除會辦一員擬俟選擇有人再行
奏派臣宣懷與帛黎數次接晤稔知其爲人具有忠心
所辦郵政有條不紊以之派充總辦實爲資其創始熟
手起見至該總局用人辦事大概均可酌量摹仿海關
遞升章程應如何釐定科目詳細規則容俟臣宣懷與

局長督同總辦及郵政司員妥慎籌畫再行陸續陳奏
請

旨核定其郵政款項自接收之日起應卽歸部設法籌
備海關以前墊款若干俟稅務處將款項帳冊移交過
部之後郵傳部再與度支部會商如何分年陸續籌還
之法另行會奏所有定期接收郵政緣由理合會同恭
摺具陳是否有當伏乞

皇上聖鑒訓示再此摺係郵傳部主稿臣等一再會商
意見相同合併聲明謹

奏 本月二十八日奉

諭旨郵傳部會奏郵政定期接管以歸統一摺著依
議欽此

部事日繁調員差遣摺

宣統三年五月

奏爲部事日繁調員差遣恭摺仰祈

聖鑒事竊

臣

部現在欽奉

諭旨幹路改歸國有郵政收回部辦以及整頓交通銀行必須得人方就能就理查有四川候補道馬汝驥心精力果歷練甚深

臣

宣懷曾與一面見其所議四川鐵路情形瞭如指掌湖南候補道朱祖蔭堅卓有爲事事精覈從前隨

臣

辦理河工振務操守尤爲可信民政部候補七品小京官劉成志在日本留學多年沈靜好學不染習氣隨

臣

由日本回國後編譯明治財政史兩年勞

苦現已完竣一俟校對齊全卽當恭呈

御覽以上三員應請

俯准飭下四川總督湖南巡撫民政部飭令迅赴郵傳部以資委用出自

鴻施所有部事日繁調員差遣緣由理合恭摺具陳伏乞

皇上聖鑒訓示謹

奏 本月初六日奉

諭旨郵傳部奏部事日繁調員差遣一摺著依議欽此

賞給廢生謝

恩摺

宣統三年五月

奏爲恭謝

天恩仰祈

聖鑒事竊准吏部咨開宣統三年五月十一日本部具奏郵傳大臣前郵傳部右侍郎盛宣懷之長孫盛毓常應給正二品廢生奉

旨依議欽此欽遵在案自

天申命聞

詔知榮感幸之私匪可言喻伏念

臣世受

國恩忝躋顯秩涓埃未罄

綸綽頻叨推

龍飛

御極之恩逮象舞成童之歲懷詒謀於周雅寵若加身
稽任子於漢廷

賞堪延世何圖稚齒亦被

殊施

臣

惟有勛以此日讀書勉其將來報

國冀家聲之勿墜庶後嗣之效忠以期仰酬

高厚鴻慈於萬一所有

微臣

感激下忱理合繕摺叩謝

天恩伏乞

皇上聖鑒謹

奏 本月十四日奉

硃批知道了欽此

各省官紳報効振款仍請援案優獎摺

宣統三年五月

奏爲各省官紳報効災振鉅款仍懇准照前案

特予優獎恭摺仰祈

聖鑒事竊查江皖災振所有各官紳報効鉅款經

臣三

次

奏請照章優獎欽奉

諭旨均著照所請獎勵等因欽此欽遵在案時勢艱難捐務久成弩末幸疊頒

優詔遠近臣民觀感漸多而振款亦得以稍資接濟茲據升缺升用署河南項城縣事西華縣知縣楊蔚湖北

分缺先補用知縣史悠壯各報効振捐銀九千兩三品
銜河南保送補用知府黃壽袞報効振捐銀五千兩江
西試用知縣王湘保報効振捐銀九千兩三品銜分發
試用同知劉安溥四川涪州知州陳偉勛郎中銜張有
成知府銜蔡繼鑫各報効振捐銀八千兩留奉候補知
縣金萃康同知銜曹茂璣各報効振捐銀六千兩部司
務銜楊貽超布理問銜杜廣文府經歷銜鄭福元鹽大
使銜彭喬年新疆疏勒府訓導何天錫府經歷銜高鍾
霖各報効振捐銀五千兩共計報効振捐銀十萬六千
兩均已如數核收由籌振公所稟報前來臣維此次沉

災蔓延數省凡毘連江北皖北各境如河南之永城夏
邑山東之滕縣嶧縣同罹斯厄情形極苦振款所需愈
爲浩大而一春多雨幾釀新災四月底各處大振放竣
其新災無麥之處復經電商查振大臣馮煦察看屬實
加放急振一次其不足者再以奉省所購高粱分別補
助華洋義振會亦分給豆種俾災區補行種植藉冀收
穫月餘以來仰邀

慈庇天氣暢晴大麥登場小麥垂熟各屬報告尙有幾
分收成子遺之民不致再填溝壑惟善後事宜如儲積
穀墾荒地設工廠養幼穉均應次第籌辦而欲除水患

尤非大舉治河不能興百世之利除數省之害臣與馮

煦疊承

詔命義不容辭祇以款絀用繁殊切力小任重之懼新捐所收悉遵部定章程限制稍嚴勢難暢旺報効一項遠近各省現甫周知尙多深明大義之人勉力輸將其襄善舉自應仍照前案

奏請優獎俾鉅款可資挹注而籌款善後及歸還度支郵傳兩部墊款奉直兩省借款亦可逐漸清理查楊蔚史悠壯報効銀兩核與報捐雙月本班先選用道員例銀有餘均擬請以道員雙月本班先選用黃壽袞報効

銀兩核與報捐不論雙單月選用道員例銀有餘擬請
以道員不論雙單月選用王湘保劉安溥陳偉勛報効
銀兩核與報捐雙月選用道員例銀有餘均擬請以道
員雙月選用張有成報効銀兩核與報捐分部郎中例
銀有餘擬請以郎中分行走蔡繼鑫金萃康報効銀
兩核與報捐雙月選用知府例銀有餘均擬請以知府
雙月選用曹茂琿報効銀兩核與報捐知州不論雙單
月選用例銀有餘擬請以知州不論雙單月選用楊貽
超杜廣文鄭福元彭喬年報効銀兩核與報捐不論雙
單月選用主事例銀有餘均擬請以主事不論雙單月

選用何天錫報効銀兩核與報捐雙月本班先選用同
知例銀有餘擬請以同知雙月本班先選用高鍾霖報
効銀兩核與報捐不論雙單月選用知縣例銀有餘擬
請以知縣不論雙單月選用上各員所請獎勵按之
籌餉例定銀數詳加復查實係有盈無絀合無仰懇
天恩俯照前奏仍准

特降諭旨所有此次報効鉅款之楊蔚等十六名均予
如請獎勵仰沐

鴻施益無既極除飭取各該員履歷造冊咨部外所有
各省官紳報効鉅款仍懇准照前案優獎緣由謹恭摺

具陳伏乞

皇上聖鑒訓示謹

奏 本月十八日奉

諭旨盛宣懷奏各省官紳報効災振鉅款請優獎一摺
所有報効鉅款之楊蔚等十六員均著照所請獎勵欽
此

節婦助振請旌表建坊片

宣統三年五月

再據上元江甯兩縣城自治會董事呈稱節婦蔣馬氏年五十歲係上元縣籍候選郎中蔣國榜候選同知蔣國平之母其夫蔣長恩係

恩賜舉人於光緒十七年身故該氏上事翁姑克盡孝養下撫諸子教育兼備前歲江甯議建義倉該氏遵其故夫遺意捐銀五千兩俾義倉得以成立今其子國榜國平復承該氏之命捐銀一千兩爲皖北振濟之用該氏守節年歲亦屬合例又已故節婦艾伍氏係江甯籍文童艾文潮之妻年十七于歸艾姓未及兩載夫病不

起該氏守節十八年事其祖姑及嫡姑繼姑皆以孝聞於宣統三年三月病故遺囑以私積簪珥變價助振及地方自治經費董事等移緩就急將該氏遺囑變價洋一千一百十元一併撥歸江皖災振之用均取具族鄰甘結呈懇附

奏請予建坊

旌表由查振大臣馮煦據呈咨明會

奏前來臣查士民捐助振款一千兩以上例得請

旨建坊今蔣馬氏捐助振款一千兩艾伍氏捐助振款一千一百十元核與建坊之例相符惟念該氏等均屬

青年矢節孝行無虧尤非尋常助振者比相應請

旨准將蔣馬氏艾伍氏

旌表節孝並給與樂善好施字樣由該家屬各在原籍
自行建坊以彰幽德而裨風化謹會同查振大臣前安
微巡撫臣馮煦附片具陳伏乞

聖鑒訓示謹

奏 本月十八日奉

諭旨又片奏節婦蔣馬氏等捐助振款請旌表建坊等
語著照所請該部知道欽此

遵籌川粵漢幹路收回辦法摺

宣統三年五月度支部督辦鐵路大臣會奏

奏爲遵

旨籌畫川粵漢幹路收回詳細辦法恭摺會陳仰祈

聖鑒事宣統三年四月十一日內閣奉

上諭郵傳部奏遵議給事中石長信奏鐵路亟宜明定幹路枝路辦法一摺數年以來粵則收股及半造路無多川則倒帳甚鉅參追無著湘鄂則開局多年徒資坐耗竭萬民之脂膏或以虛糜或以侵蝕恐曠時愈久民累愈深上下交受其害貽誤何堪設想用特明白曉諭昭示天下幹路均歸國有定爲政策至應如何收回辦

法著度支部郵傳部凜遵此旨悉心籌畫迅速請旨辦理該管大臣毋得依違瞻顧一誤再誤如有不顧大局故意擾亂路政煽惑抵抗卽照違制論將此通諭知之欽此四月二十四日內閣奉

上諭前經降旨鐵路幹路收歸國有並派端方以候補侍郎充督辦粵漢川漢鐵路大臣迅速前往妥籌辦理現既將鐵路改歸官辦著自降旨之日起所有川湘兩省租股一律停止其宣統三年四月以前已收之款著郵傳部督辦鐵路大臣會同該省督撫詳細查明妥擬辦法奏聞總不使有絲毫虧損失信吾民此外如有另

立各目捐作修路之款一併查明請旨辦理欽此五月
初六日內閣奉

上諭王人文電奏據四川諮議局呈稱川省紳民自奉
鐵路改爲國有之命紛紛函請暫緩接收並請緩刊謄
黃等語覽奏殊深詫異鐵路改歸國有乃以商民集款
艱難路工無告成之望川省較湘省爲尤甚且有虧倒
鉅款情事殃民誤國人所共知朝廷是以毅然收爲國
有並停收租股以恤民艱旣經定爲政策決無反汗之
理王人文著傳旨嚴行申飭仍著迅速刊刻謄黃徧行
曉諭至已收租股並著趕卽查明由度支部郵傳部督

辦鐵路大臣會同該署督妥籌切實辦法請旨辦理欽此五月初三日奉

上諭署大理院少卿王世琪等奏湘路加抽各股請一律停止一摺所奏頗能仰體朝廷德意俯察民生疾苦著卽將湖南所有因路抽收米捐鹽捐房捐各股與前項租股概行停止其已收之款仍著郵傳部督辦鐵路大臣湖南巡撫恪遵前旨一併詳細查明妥擬辦法奏聞欽此五月十五日奉

旨張鳴岐電奏幹路收歸國有請從速決定歸還股本辦法等語著度支部郵傳部督辦粵漢川漢鐵路大臣

妥速議奏欽此五月十八日奉

旨張鳴岐電奏粵民對於路事抗拒情形酌擬辦法請
堅持國有政策准令商股悉領現銀等語著度支部郵
傳部督辦粵漢川漢鐵路大臣歸併前案妥速議奏欽
此同日又奉

旨御史黃瑞麒奏借款官修幹路宜仍留商股一摺又
片請飭將停收以前所收米鹽各款悉數解交公司不
准挪用等語著度支部郵傳部督辦粵漢川漢鐵路大
臣悉心妥議具奏欽此各等因仰見

朝廷通籌全局明定政策以造路爲統一行政之本原

以停捐爲體恤民艱之要義恭讀之下欽服莫名臣等
公同會議粵漢鐵路於光緒三十二年改歸商辦不惜
鉅資贖銷美國借款合同實係張之洞主之宣統元年
又與四國訂立借款合同亦係張之洞主之豈好爲其
難哉亦實見商辦之難見成效鄂湘商股固甚微薄瑞
澂電稱鄂路並無尺土寸料湘路雖有米捐鹽捐田租
房租然路綫甚長民計甚窘竭力搜索告成無期故張
之洞絕不迴護前言遺摺尙言此次粵漢川漢鐵路關
繫繁重必須官爲主持俾得早日觀成並准本省商民
永遠附股藉爲利用厚生之資等語又查移交案內總

理余肇康致張之洞函稱湘省財力有限斷難驟得大宗以之專造洙昭或可敷用此外工程自非多分數國籌借不可惟盼早日定局以期從速開辦大工等語此張之洞奏請鄂湘借款紳士認可之情形也至川省則已收租股等項一千數百萬兩粵省則自丙午年起已亥年四月止商股已收第一第二期銀一千數百萬兩六七年來果能切實進行粵路自黃沙至坪石不過六百里川路自宜昌至夔州亦僅六百里已可觀成將謀接綫乃六年之久粵路僅造成一百七十里尙有前用美款造成黃沙至高塘幹路棠涌以下六英里已安鋼

軌棠涌以上六英里築基已成未安鋼軌共十二英里合三十六華里在內又石圍塘行車處接收物料值銀九萬三千餘圓又黃沙貨倉接收物料值銀四十四萬六千餘圓又已買地價計銀十二萬三千餘兩一概估折移交詹天佑到粵新訂軌之路由黃石站至黎峒二十一里尙未開車自黎峒至韶州二百二十九里內僅止築基過半而支出之款已一千四百七十七萬餘兩僅存材料價銀七十四萬八千餘兩去年六月郵傳部覆奏袁樹勛奏參粵路弊混一摺據候補參議龍建章等查粵路自丙午開辦起至己酉第五段通車止一百

四十五里用銀六百二萬五千餘圓每里攤四萬一千三百餘圓核與梁誠電稱每里二萬暨鄺孫謀面稱每里二萬六千及二萬九千圓數目不符造路如此之少用款如此之多且歲月遷延恐新路未成而一百七十里之枕木已朽爛矣又川路據道員馬汝驥電稱宜昌路工查得大概除北京滬漢成渝費用不計外自光緒三十二年七月設局起至宣統元年十月止支開辦費約計三十三萬餘兩自元年十一月開工起至三年四月止共支出銀四百十餘萬兩現存材料約值六十餘萬兩內有未付之價十一萬餘兩購入地畝計值十九

萬餘兩現存錢莊生息十萬兩現銀二萬餘兩宜局向無多存款按月須在滬漢撥支又路工計由宜昌至歸州綫長二百八十餘里分十段均開工已成通車運料者三十餘里橋洞未完未通車者八十餘里在工夫役四萬餘人俟接收之員到工後方能截數造報又據四川護督王文電稱存款僅七百餘萬與宜昌所報合而計之共計一千一百數十萬其餘施典章上海倒帳約計三百萬前經四川官甘大璋等嚴劾在案總之鐵路國有民有本屬無甚出入目下國計艱難果能商民實力舉行不致延曠虛糜亦可毋庸遽歸官辦無如

取諸民捐則如王人文所言催比追呼繁興訟獄閭閻
愁歎不絕取諸商股則如袁樹勛所言糜費作弊工程
草率股東概不與聞在商民受害無窮而國防關係尤
鉅

朝廷毅然收歸國有銷除商辦各案實亦出於萬不得已之辦法今據御史黃瑞麒奏稱收回幹路而不將所收股款絲毫給還固爲失信但還股款而不使民間享修路之利仍不免爲失信且京奉鐵路至今商股未退幹路國有不必完全官股可知擬請

明降諭旨將川漢粵漢以前所抽所招各股改換官辦

股票仍照原定官利按時給息路成之後一律分給紅利其有不願領換股票者卽將原股如數給還不使有絲毫虧損且各項加徵之股款雖當停止以恤民艱而全國富商未嘗不可招之使來以期眾擎易舉等語所陳不爲無見臣等於四月十二日電致各省督撫卽是此意其所爲難者四省情形各有不同受弊輕重亦異臣等仰體

聖意俯察輿情但求於路政力圖進行決不與民爭利應卽准如該御史等所請將粵川湘鄂四省所招所抽之公司股票盡數驗明收回擬由度支部郵傳部特出

國家鐵路股票粵漢川漢仍分兩種照數更換仍照長年六釐支息倘欲抽還股本約以五年後分作十五年還本從前京奉鐵路所留商股不分餘利此次格外從寬如有餘利按股均分並准將此項股票向大清銀行交通銀行按照行規抵押以便流通惟該公司願領此項國家保利之股票者則悉照歷年路工支出之款除倒帳外毫無折扣倘或願領資本不願換領國家保利股票者必應分別辦理以昭平允一粵路全係商股已收之第一批每股一元第二批每股一元五角近年因路工遲滯糜費過多票價每一元跌至二角刻因有人

收買每一元漲至四五角現擬每股從優先行發還六成每二元五角先發現銀一元五角以路工及材料支款一千四百七十餘萬按里攤算實不止袁樹勛所奏每里費銀五萬七千餘元之數虛糜已達極點其餘每股四成久在虧耗之列此皆任事人及股東查帳員應職其咎在出股者不無可原然所舉非人漫無覺察亦屬自失股東權利現擬格外從寬將四成一元之數另發國家無利股票俟路成獲利之日准在本路餘利項下分十年攤給以示體恤一湘路所收五百數十萬內有米捐鹽捐租股房股各項四百餘萬兩商股約一百

萬左右支款內開修路購料約二百餘萬兩據余肇康電稱洙洲至長沙一百餘里已經完工開車碼頭各項均已齊備約計其數耗費無多擬定將實在商股一百萬兩照本發還其餘米捐鹽捐租股房股除美國贖約經費三百餘萬兩外准卽另發國家保利股票長年息六釐五年後分作十五年攤還以充本省實業公用一鄂路所收商股粵川兩項共一百十四萬五千餘元據湖廣總督上年冬季冊開除已支用外尙存現銀三十二萬餘元向歸官局經理又該省上年所設公司共收新股九十七萬餘元續據湖廣總督單開現尙存銀九

十一萬餘元其實在商股應准湊足歸還現銀至川漢彩票股另發國家無利股票俟路成獲利之日准在本路餘利項下分十年攤還另有動用振糶捐除美國贖約經費不計外其餘如有實用者准照湖南米捐一律辦理一川路現存款七百餘萬如願入股應准悉數更換國家保利股票五年後仍分作十五年還本亦可隨時抵押並可分得餘利除倒帳外其宜昌已用之款四百數十萬准給發國家保利股票一律辦理又宜昌開辦經費三十三萬及成渝各局用費若干則發國家無利股票與粵股一律悉歸本省興辦實業之用此外粵

漢未贖之美比小票二十二萬二千二百金元在此次借款內撥還前已

奏明在案至所借贖約英款尙有本息五十七萬餘鎊未還三省路工既經收回官辦自應由郵傳部查照原約按期另行籌還以上所擬辦法臣等盱衡時局博採輿論似已仁至義盡大約以商股與公捐不同實用與虛糜又不同故不得不稍示區別或還現款或給保利股票或給無利股票分作三項辦法而終不使其資本虧折絲毫仰副

朝廷德意如蒙

俞允應由臣部咨明各督撫臣並會商臣端方迅速派
員分往各省按照章程妥籌辦理一面由臣端方收路
開工至於趕辦工程之法必須多分段落庶可尅期告
竣擬請以武昌至長沙爲一大段以長沙至郴州爲一
大段以郴州至廣州爲一大段以廣水至宜昌爲一大
段以宜昌至夔州爲一大段以夔州至成都爲一大段
其武長一段長郴一段郴廣一段均限三年完工郴廣
一段本擬責成詹天佑一手辦理必令長郴一段同時
完工俾得接軌如粵商欠繳之二批未繳之第三批股分
如數照繳便可無庸借款成夔一段路綫甚長尙須另

行籌款限於夔宜一段完工之時俾得接軌從前用點
工自造之法未免擔擱此次各段擬參用洋匠包工之
法以求迅速惟各段分辦斷非一手一足之力所能兼
籌並願應由督辦大臣會同郵傳部悉心遴選廉明切
實可靠之員奏明委派並於監工之外各派管理收支
一員以資稽核借款銀行雖派有查帳員如我得人不
爲彼所輕視其中保守利權自必不少各員派定之後
卽飭各段總辦分往各路接收工程截清界限其商辦
公司前此已用之款飭令督同趕造實報實收之帳冊
以憑核辦各路總辦之外並當由督辦大臣遴選正派

幹練之紳士各省一人爲總紳遇有地方交涉事件應令認真照料俾免隔闕以上辦法均經_臣等細加籌酌並與總協理大臣妥商一切意見相同將來如有未盡事宜容_臣等隨時會商請

旨辦理所有遵

旨籌議各緣由理應合詞具奏是否有當伏乞

皇上聖鑒訓示謹

奏 五月二十一日奉

上諭度支部會奏遵旨籌畫川粵漢幹路收回詳細辦法各摺片鐵路收歸國有固以維持路政實以體恤民

艱前經降旨停收川湘等省各項股捐並累次諭令將已收之款妥籌辦法茲據奏稱請將粵川湘鄂四省所抽所招之公司股票盡數驗明收回由度支部郵傳部特出國家鐵路股票常年六釐給息嗣後如有餘利按股分給倘願抽本五年後亦可分十五年抽本未到期者並准將此項股票向大清交通銀行照行規隨時抵押其不願換國家鐵路股票者均准分別辦理以昭平允粵路全係商股因路工遲滯糜費太甚票價不及五成現每股從優先行發還六成其餘虧耗之四成並准格外體恤發給國家無利股票路成獲利之日准在本

路餘利項下分十年攤給湘路商股照本發還其餘米捐租股等款准其發給國家保利股票鄂路商股並准一律照本發還其因路動用振糶捐款准照湖南米捐辦理川路宜昌實用工料之款四百數十萬兩准給國家保利股票其現存七百餘萬兩願否入股或歸本省興辦實業仍聽其便等語籌畫尙屬妥協著督辦粵漢川漢鐵路大臣迅速前往會同各該省督撫遵照所擬辦法將所有收款分別查明細數實力奉行朝廷於此事審慎周詳仁至義盡經此次規定後倘有不逞之徒仍藉路事爲名希圖煽惑滋生事端應由該督撫嚴拿

首要盡法懲辦毋稍寬徇以保治安欽此

代陳川紳呈請租股辦法片

宣統三年五月 度支部
督辦鐵路大臣會奏

再正在封摺間據四川京官裁缺內閣侍讀學士甘大璋等四十六人聯名呈稱爲川省租股籌集維艱懇請將收支虧存各款分別澈查一律劃歸國家路款以釋羣疑而留民利事竊川路抽租作股比於加賦平日追呼敲剝竭數百萬家之膏血始哀集而成此巨款時閱七八年僅築就宜境數十里耗費已數百萬虧倒又數百萬凡屬川民莫不椎心疾首呼籲同聲上月二十四日

宸斷毅然收爲國有迭奉

愚齋存彙

卷十七 奏疏十七

思補樓藏版

諭旨停止租股減輕小民負擔已收之款查明妥籌辦理不使絲毫虧損失信於民各等因仰見

朝廷燭照萬里軫念邊黎騰黃之詔一頒保赤之心如見歡聲雷動禁令風行此後全路有告成之望卽全款不至有無著之虞祇聆之下欽戴莫名職等以爲路歸國有自屬

國家應行政策然民間疑慮旣失其股東之利於前又將擔其借款之害於後前此已收租股或卽如數發還而中飽侵漁層層股削較初收時尤甚款未下逮已歸烏有仍與虧倒無異竊維該路收回國有本欲策路成

功並非與民爭利查各國鐵路通則官辦國有之路可
以不收民股亦可附收民股均由國家規定今租股係
先集之民款自應予以共享之利益且川路公司規定
原有正式募股其願照認股如數交款者亦應利益均
霑現在國家帑藏空虛築路一事與其多借款於外曷
若多分利與民停其按畝抽租仍存正式募股則隱寓
實行國債票之策卽預爲備款贖路債之資爲國爲民
兼全之計莫善於此應請

飭令部臣暨督辦大臣四川總督轉飭各廳州縣各局
所將宣統三年四月以前川路已收已支及現存之款

未解之款分別查明冊報一律歸爲路股換給國家鐵路股票並請查照官督商辦時定章仍存正式募股招集商民認股售票以示

朝廷與民共利至公無私之意一轉移間羣疑盡釋大信昭然抑更有請者從前公司失敗川紳商民尙有會議詰查之權今路歸國有則局用之浮濫經手之侵欺虧例之追繳鄉人不能過問應請

嚴旨按律勒追或另籌抵補務令出此千數百萬之民人均得處於完全鐵路股東之地位則全川士庶咸頌皇仁於無既矣爲此聯名環懇除具呈度支部外伏乞

據情代奏等情臣等公同閱看核與臣部現籌辦法大
致相同理合據呈附片代

奏伏祈

聖鑒訓示謹

奏

各省官紳報効振款仍請援案優獎摺

宣統三年六月

奏爲各省官紳報効災振鉅款仍懇准照前案

特予優獎恭摺仰祈

聖鑒事竊查江皖災振所有各官紳報効鉅款經

臣四

次

奏請照章優獎欽奉

諭旨均著照所請獎勵等因欽此欽遵在案茲據同知銜舉人白承頤報効振捐銀九千兩湖南桃源縣知縣章錫光江蘇候補知縣王克均各報効振捐銀六千兩運同銜施鳳翔報効振捐銀七千兩郎中銜凌寶健曹

師憲各報効振捐銀五千兩縣丞銜皇甫範報効振捐銀六千兩主事銜袁丕元巳酉恩貢陳允中府經歷銜顧復王鼎薰王毓樞翰林院待詔銜鄧振墀布理問銜周師熊府經歷銜陳積澍縣丞銜聶廷蔚各報効振捐銀五千兩又直隸提督姜桂題報効專放亳州振款銀五千兩共計報効振捐銀九萬四千兩均已如數核收由籌振公所稟報前來臣查辦理各災區善後一切事宜及應歸還各項借墊款項爲數甚鉅全賴各省官紳勉力報効藉資接濟自應仍照前案

奏請優獎以昭激勸查白承頤章錫光王克均報効銀

兩核與報捐雙月選用知府例銀有餘均擬請以知府
雙月選用施鳳翔凌寶樾曹師憲報効銀兩核與報捐
雙月選用郎中例銀有餘均擬請以郎中雙月選用皇
甫範報効銀兩核與報捐雙月選用員外郎例銀有餘
擬請以員外郎雙月選用袁丕元陳允中報効銀兩核
與報捐分部主事例銀有餘均擬請以主事分部行走
顧復王鼎肅王毓樞鄧振墀報効銀兩核與報捐不論
雙單月選用主事例銀有餘均擬請以主事不論雙單
月選用周師熊陳積澍報効銀兩核與報捐雙月選用
同知例銀有餘均擬請以同知雙月選用聶廷蔚報効

銀兩核與報捐不論雙單月選用知縣例銀有餘擬請以知縣不論雙單月選用姜桂題報効銀兩核與報捐分部主事例銀有餘擬請移獎伊子主事銜姜瑞森以主事分部行走以上各員所請獎勵按之籌餉例定銀數詳細復查實係有盈無絀合無仰懇

天恩俯照前奏仍准

特降諭旨所有此次報効鉅款之白承頤等十七名均予如請獎勵仰沐

仁施愈深感戴除飭取各該員履歷造冊咨部外所有各省官紳報効鉅款仍懇准照前案優獎緣由謹恭摺

具陳伏乞

皇上聖鑒訓示謹

奏 本月初一日奉

諭旨盛宣懷奏各省官紳報効災振鉅款請優獎一摺
所有報効鉅款之白承頤等十七員均著照所請獎勵
欽此

李訓鉉報効振款請開復原官片

宣統三年六月

再准雲貴總督

臣

李經羲咨稱留滇差委開復原銜前

雲南三品銜知府用補用同知黑鹽井提舉李訓鉉經

前督

臣

錫良於甄別案內

奏參革職查該員歷任黑白石膏三井提舉久任鹽缺
成勞昭著被參原案並無實在劣跡邊省鹽務重要整
理需人於宣統二年二月二十七日附

奏請將該員先行開復原銜留滇差委四月十二日欽
奉

硃批著照所請該部知道欽此欽遵在案茲該員以江

皖災振需款甚急報効振捐銀二萬兩聲明不敢仰邀
獎敘稟請咨解核收等因准此臣查該員李訓鉉既經
督臣李經羲查明原叅並無實在劣跡業已開復原銜
奏奉

俞允現因災振緊要報効鉅款實屬深明大義有裨時
艱自應照章

奏請優獎以昭激勸合無仰懇

天恩俯准將留滇差委開復原銜前雲南三品銜知府
用補用同知黑鹽井提舉李訓鉉開復原官升階升銜
出自

高厚慈施除將該員履歷咨部查照外謹附片具陳伏
乞

聖鑒訓示謹

奏 本月初一日奉

諭旨又片奏開復原銜已革雲南黑鹽井提舉李訓鉉
報効鉅款請優獎等語李訓鉉著開復原官欽此

請准江皖新捐展期勸辦摺

宣統三年六月

奏爲江皖新捐收數甚薄借墊各款尙難歸償籲請查照兩次部議

准予展期勸辦以清款目並將災區善後事宜妥速籌辦恭摺仰祈

聖鑒事竊照宣統二年十一月間大學士臣陸潤庠等奏稱江皖災區延蔓千數百里災民數十百萬天寒糧盡餓孳枕藉請

簡派臣爲籌振大臣籌墊鉅款趕放急振欽奉

諭旨著照所請等因欽此臣奉

命後卽經擬請

飭由度支部預墊捐款銀三十萬兩郵傳部暫借路款銀三十萬兩並飭通商銀行等設法息借迅解災區妥爲散放一面請設籌振公所凡現在准辦各項捐輸統歸公所照章勸辦由臣分別

奏咨請獎其各省現辦新舊振捐一律暫行停止於宣統二年十二月初四日奏奉

諭旨盛宣懷奏江皖災重擬請設立籌振公所各摺片均著照所請該部知道欽此嗣因東三省直隸省辦理防疫事宜需用浩大該督臣等先後電奏請借鉅款奉

旨著該部議奏等因欽此卽經度支部兩次遵議復奏均請歸入江皖振捐案內展期勸辦清償借款奉

旨依議欽此欽遵咨行查照在案臣查上年江北皖北

水患波及鄰省災深地廣款絀用繁實非尋常偏災可比自籌振以來撥解江皖兩省及河南山東毘連各州縣振款振糧以及運費川資平糶粥廠約計已在一百四十萬兩以上頭緒紛紜應俟各路員紳稟報到齊會同查振大臣馮煦分別核明專案奏報江皖新捐自上
年十二月初四日奉

旨之日起除去封印一箇月計至本年閏六月初四日

已屆原奏六箇月之期惟現在各省均已紛紛奏請展
限雖經部議准展仍聲明俟江皖災振奏明停止後方
准收捐造報誠恐捐生因此觀望減成收數更難起色
且各省遠近不一臣咨請各省督撫臣並照會藩司分
派委員廣爲勸辦近省所收甚細其遠省皆甫經接到
實收捐章轉瞬期滿卽趕辦亦恐無多公所已收各項
捐款咨部核獎者計十二次其收捐款銀三十一萬三
千餘兩官紳報効鉅款

奏請優獎者計五次其收捐款銀五十五萬兩以之抵
償災振墊款防疫借款所短甚鉅並查度支部所撥江

皖振銀三十萬兩原擬將部收捐復銀兩抵還現在捐復難辦亦應由臣所收之捐款內如數撥還其尤難者各災區善後事宜一切尙未舉辦臣與馮煦往返電商如積穀墾荒等事須由地方官次第認真辦理目下惟有擇地先設貧兒院工藝廠將查振時收留幼穉妥爲安置先養後教俾免失所災民承饑饉之後氣體本弱外感易侵所食草根樹皮亦蘊而生癘皖北爲重江其次之與東省鼠疫雖不相同然據各處義紳報告死亡頗多救不勝救現已商由馮煦分飭各州縣延醫購藥設局施濟所需經費作正支銷並由華洋義振會仿照

紅十字會辦法選派西法華醫備帶藥料及看護人等
前往救治力盡人事以感召天和或不致釀成大疫然
此數省歷年頻遭水患皆因水利不修儻不及早圖維
稍遇偏災卽成澤國所有支河溝洫先經義紳稟請疏
濬如清江之六塘河淩溝口劉老澗等處業已撥款交
紳籌辦而欲除後患必須大舉導淮始可一勞永逸其
工非尋常之工其款亦非尋常之款自應凜遵前

旨會同江皖豫等省督撫臣並商諮議局另籌辦理昨

接美使函稱彼國紅十字會已派工程師詹美生來華
前赴江蘇安徽一帶測量被災地方河道深淺高下先

定尾閘方能依次濬治先經內閣電咨兩江督臣查照

在案該洋工程師來華以後勘河川資工費初擬由華

洋義振會擔任臣以事關內政已與美使及該會妥商

仍由籌振項下開支以顧大體凡此善後應辦之事需

款均屬繁重則新捐實有不能不展之勢臣與度支部

臣再四熟商意見相同擬請仍照前奏所請振捐常捐

部捐及報効等項捐款一律展期半年仍歸江皖籌振

公所照章核收所收款項除籌辦善後事宜外隨時歸

還借墊各款以期陸續清償至各省原辦新舊振捐均

已歷次請展與江皖新捐情形確有輕重緩急之分各

捷濟有異 卷一
督撫臣公忠夙著諒能共體時艱照案仍暫停收移緩
就急並免互相減跌於

國體財政皆有損礙合無仰懇

天恩俯准仍照前奏所請各節展辦半年以清款日出
白

鴻施無任惶悚所有江皖新捐擬請查照兩次部議展
期勸辦各緣由理合恭摺具陳伏乞

皇上聖鑒訓示謹

奏 本月二十二日奉

諭旨籌辦江皖振務大臣盛宣懷奏江皖新捐收數甚

薄借墊各款尙難歸償請查照兩次部議展期勸辦以
清款目並將災區善後事宜妥速籌辦一摺著依議欽
此

請暫留山西署提法使翁斌孫經理振款片

宣統三年六月

再新授直隸提法使現署山西提法使翁斌孫前經

臣

札委辦理山西全省江皖振捐事宜該省民愿地偏集款不易該司熱心勸募派員四出廣爲招徠捐數賴以稍旺現據稟報各屬認捐甫達十餘萬兩正待設法推廣兼以州縣造報遲延捐生交款濡滯非得該司督率於上恐已認者任催罔應未來者觀望不前實於振捐不無關係合無仰懇

天恩俯念捐款緊要准其暫留署任稍緩來京

陸見俾得一手經理速竟全功出自

鴻施逾格臣爲慎重振需起見是否有當謹附片具陳
伏乞

聖鑒訓示謹

奏 本月二十二日奉

諭旨又片奏捐款緊要請將新授直隸提法使現署山西提法使翁斌孫暫留署任等語著毋庸議欽此

愚齋存彙卷第十七終